

AIA RONGORONGO TAAN KAIIRI

Karinean te Tabati ao Irirakin te Toa

Iroun Unimwaane James J. Hamula

E kaan te ririki n nako, kainabau ao Ngai ti okirikaaki nakon te United States imwiin nimaua te ririki ni mwakuri n Aonon te Betebike. I mwakuri n te Beretitentii n te Aono; Titita Hamula bon toau ae tangiraki ao tinaia teniman natira ake a raoniira. Inanon ara nimaua n ririki n Aonon te Betebike, Titita Hamula ao Ngai,

ti raonaki n tainako irouia natira, ni kawari ngkami n abami aika tikiraoi n taai aika mwaiti. N tainako ngkana ti kawari ngkami, ti butimwaeaki ma te tangira ao te mwannanoaki. Ni koauana, ti aki toki ni butimwaeaki ma te akoaki. Ma ti reiakinna bwa anne aroia kaain te Betebike—ni kaota te tangira nakoia ake a roko.


**Unimwaane
James J. Hamula**



N taetae ibukin ara utu, I kaota ara tangira ae korakora ao ara kakaitau nakoimi. Tikura ibuakomi e kakorokorai maiura n aki toki. Kam reireiniira n tatangira, ni maiuakina ae bebete, ao ni kakaitau n tainako ma te kantaninga ae akea tokina. Ni koauana, kam reireiniira arora ni kukurei n te maiu aei. Mai iroumi, ti reiakinna bwa aomata aika kukurei akea irouia tamaroan bwaai; a karaoa te kabanea n tamaroa man aia bwai are iai irouia. Ao anne ae ti noria mai iroumi n taainako n tikura ibuakomi.

N tikura ibuakomi, ti kunea bwa tiaki ti aron tangirakiia naake a kawari ngkami mai kiraroa, ma aromi n tangiriia naake irarikimi aika a kainnano. Ti noora aromi n ibuobuoki nakoia raomi i Ha'apai, Tonga ma angabwai n te amwarake ao bwaai imwiin oreakin abaia n te cyclone te ang ae moan te korakora. Ti noora naba aromi n ibuobuoki nakoia raoraomi i Vanuatu ma ami angabwai n te amwarake ao bwaai aika mwaiti riki imwiin oreakia naba n te cyclone te ang ae moan te korakora. Iaon aaba ake a katobibiaki n taari, kam ata aron kai uruakina ao kangangan te maiu. Ao te taneiai anne e karikiko bwa ko na karaoa te mwakuri n te tai ae waekoa nakon kainnanoia raoraom aika a rangin ni kainnanoa te ibuobuoki ao n aki toki ni bubuti nako karawa ibukin te kamanoaki ao te kaimaiuaki mai iroun Tamara are i Karawa.

N te bong aei, I tangiria n taetae iaon uoua reirein ana euangkerio Iesu



Te Kabanea n Toa, iroun Carl Bloch



*Ni kaineti ma te Tabati,
e a tia te Atua ni kaoira
ni katuka teuana te bong
inanon itiua ni "motirawa"
man ara mwakuri ni
katoabong.*

Kristo aika kakawaki, are, ngkana e bwainaki ao n teimatoa ni maiuakinaki, e na uota te kamanoaki ao te kamaiuaki nakoimi, n aki tabe bwa aekakira aron kakamakun angibukan te maiu. Reirei aika uoua aikai bon te kakaonimaki ni karinean te Tabati, ao te ongotaeka nakon te otenanti n te toa.

Karinean te Tabati

Mai moana, Tamara are i Karawa e kaonota te bong ae te Tabati ao n tua bwa e na kawakinaki bwa e tabu. Ti warekia ni Karikani Bwaai: "Ao n te

kaitiuu ni bong E katia ana mwakuri are E karaoia te Atua; ao E toki n te kaitiuu ni bong man ana mwakuri ni bane ake E karaoi. Ao te Atua E karaoiroa te kaitiuu ni bong, ao E tabuia~. ." (Karikani Bwaai 2:2–3). E ngae ngke akea kakauan karinean te Tabati imwain Mote, akea te nanououa iai ibukin aki taun rekooti ni booki aika tabu. Te Tabati bon te tua mai ieta ngaia ae e na riai n tia n riki man ana tai Atam, n te tai ngke e mena te euangkerio iaon te aba ibuakoia aomata.

Tuan te Tabati ae akea tokina e taekinaki nakon Mote. Iaon te Maunga

ae Tinai, te Atua E tuanga Mote ao natin Iteraera bwaai aikai: "Ko na uringa te bong ae te tabati, n tabuia. Onobong am bong ni mwakuri, ma ni katia am mwakuri: Ma te kaitiuu ni bong bon ana Tabati Iehova ae Atuam: e taekinaki ae kangai ko na tai mwakuri iai teutana. . . . Ba E karaoa karawa Iehova ma aonaaba, ma marawa, ma bwaai ni kabane ake i nanoia n onobong, ao e toki ni karaoi bwaai n te kaitibong: ma ngaia are E karaoiroa te bong are te Tabati Iehova, ao E tabuia" (Te Otinako 20:8–11).

Imwiina, te Atua E reireina Mote ao tibun Iteraera bwa te Tabati bon te berita ae teimatoa imarenai n aki toki. "Kam na bon kakawakin au Tabati nako," e tuangiia tibun Iteraera te Uea, "[Ba] te kanikina i marenau ma ngkami i nanon ami roro nako; ba kam aonga n ataa ba Iehova Ngai ae I tabuingkami. . . Ma ngaia ae [a] na tabua te tabati inanon [aia] roro nako, ba te berita ae akea tokina" (Te Otinako 31:13, 16).

N te aro raa are e na riki iai te Tabati bwa te berita ae akea tokina? Te berita ae akea tokina bon te boraraoi ae tabu imarenan te Atua ao te aomata. E katea mwiin taikan te boraraoi te Atua, ao e berita mwiin te ongotaeka nakon taikan te boraraoi. A kariaiakaki aomata n inaomata n rin nakon te boraraoi. Ngkana e ongotaeka te aomata nakon taikan te boraraoi, te Atua e na kakoroa bukin Ana berita. Ngkana e aki ongotaeka te aomata nakon taikan te boraraoi, e tiku anne nakoina ao e na aki karekei ana berita te Atua.

Ni kaineti ma te Tabati, e a tia te Atua ni kaoira ni katuka teuana te bong inanon itiuu ni "motirawa" man ara mwakuri ni katoabong. N etina raoi, te "Tabati" nanona "motirawa." N te bong ni motirawa aei, e tua te Atua bwa ti na katikui ara mwakuri ao ara waaki ni kakukurei ni Uringa —uringa Ana karikibwai ibukira ao te aonaaba ae ti maeka iai ngkai, ao uringa Ana mwakuri ni kaitiakiira, ke ni kamaiura, man te mate n rabwata ao n tamnei. N te bong ni motirawa aei, e kantaningaira te Atua bwa ti na kabongana te bong ni manga kaetiira

nako Ina ao berita aika ti a tia ni karaoi ma Ngaia, ao ni beku Ibukina man ara mwakuri ibukiia Natina.

Ngkana ti na kanga ni kawakina te Tabati bon te kanikina nakon te Atua ni kaineti ma ara butimwaai ao ara ongotaeka nakon Ana babaire ibukin kamaiuakira. Ngkana ti kawakina ao ni karinea te Tabati, bon te kanikina nakon te Atua bwa ti butimwaia bwa te Tia Karikiira, Tamara, Atuara, ao ti tauraoi n iri Ana tua ao ana reirei ake a kainnanoaki ibukin kamaiuara n akea tokina. Ngkana ti aki kawakinnna ao ni karinea te Tabati, bon te kanikina nakon te Atua bwa ti a tia ni baireia ni butimwaai atua tabeman—atuan te kukurei, atuan te bitineti, atuan te babakanikawai, ke temanna maibuakoia atua aika mwaiti n te aonaaba aei. Ni uarerekena, ti kawakinnna ke ti aki karinea te Tabati bon te kanikina nakon te Atua ae Tamara bwa ti tangiria ke tiaki n riki bwa Ana reirei ao ana taan karekei Ana kakabwaia aika mwaiti.

Ao aekakira korakoran ao kakawakin ana kakabwaia te Atua nakoia ake a rineia bwa ana Iria! Nakoia aika kawakina ao a karinea te Tabati, e taku te Atua: "N na anga iai ami karau ni bongia, ao e na anga amarakena aon te aba, ao ana kariki uaia kaain te tawana . . . ao kam na kana ami amwarake n rauaki iai, ma ni maeka ni maiu i aon abami. "Ao n na angani [ngkami] te raoi nakon aon te aba, ao ane kam na wene, ao akea temanna ae na kakamakui ngkami. . . . Ao n na mutiakini ngkami, ao N na kabatiaia natimi, ma ni kamaitia, . . . "Ao N na nakonako i buakomi, ma n

riki ba Atuami, ao kam na riki ba au aomata" (Nakoia Ibonga 26:3-12). Te aba ae karikiua, autinibwai aika onrake, te kamaiuaki ao te rau, ao n raoniira te Atua ibuakora. A kona n reke berita aika korakora nakon te aomata, riki nakoia naake a maeka imataniwiin taari?

Ma a mwaiti riki. Nakoia naake a kawakina ao a karinea te Tabati, e berita te Atua bwa E na "kakukureia i nanoni maneabau n tataro: ana kariaiakaki i Rou aia karea nako i aon aoni baonikareau" (Itaia 56:7). N taekana tabeua, e berita te Atua bwa naake a kawakina ao ni karinea te Tabati bwa E na ongo ao ni kaekai aia tataro ao ni butimwaai aia angabwai ao aia karea aika karaoaki n Arana. Tariu ao mwaneu, tera ae ko tataro ibukina? Ibukin tera te bwai ae ko kantaningaia ni kaboa mwiin am angabwai ao am karea nakon te Uea? E berita te Atua bwa tataro ao kantaninga a na kona ni korobukiia ngkana ti kawakina ao ni karinea te Tabati. Ni kouana te berita anne e karika te tia kawakina te Tabati "ni kimwareirei n [te] auti n tataro"!

Ao e berita te Atua n ae mwaiti riki nakoia ake a kawakina ao ni karinea te Tabati. "N nakoia," e taku te Atua, "n na angania bwaini kantuningaia i nanoni maneabau ao i nanon au nono, ma tera ae raoiroi riki nakoia naati mwaane ao naati aine: N na anganiiia te ara ae akea tokina, ae na aki teweaki nako. . . . N na boni kairiia nakon au maunga ae tabu" (Itaia 56:5, 7). Iai nanon te taetae anne nanona ae nano ao akea kabotauana; e tei ibukin ana berita

te Atua ni uotia aika a kawakina ao a karinea te Tabati nako nanon Oin mweengana n te tiretio ao ni katauraoi ibukiia n tatabemaniiia te tabo ao te ara ae na aki kona ni bua. Tariu ao mwaneu, akea te berita ae tamaraoa riki nakon aei. Bon te berita n te karietataaki ao te maiu ae akea tokina!

Karekean kakabwaia aikanne, ti na kanga ni kawakina ao ni karinea te Tabati? N taai akekei, e baireia te Atua bwa e na karoaaki te Tabati n te kaitiuu ni bong n te wiiki, te Kaonobong, ni kauringa te Karikibwai. Imwiin rokon Iesu Kristo, e rineaki te Tabati iroun te Uea bwa e na karoaaki ni "moani bongin te wiiki ae koraki," Te Tabati, ni kauringa Ana Mwakuri ni Kamaiu Iesu Kristo (Mwakuri 20:1; I-Korinto 16:2; Te Kaotioti 1:10). E kakawaki n aron te karikibwai bon inanon te babaire ni kamaiu, bon Ana Mwakuri ni Kamaiu Iesu Kristo, are e korobukina ni moanibongin te wiiki, ke te Tabati, are e tei ibukin karikibwai ni kabane ao ngkai e na kauringaki.

Te Tabati are e riai ni kawakinaki bwa ana Tabati te Uea are e kama-toaki iroun te Uea inanon kaotioti n taai aikai. N Aokati 7, 1831, are bon te Tabati, e taetae te Uea nakon te burabeti Iotebwa Timiti, ni kangai: "[T]e [bong] aei bon te bong ae rineaki nakoimi bwa kam na motirawa man ami mwakuri, ao ni karoa te karine-rine nakon ae Moan te Rietata . . . [U]ringa bwa iaon aei, ana bong te Uea [ke te Tabati], a na anga aia angabwai ao aia toa nakon ae Moan te Rietata . . ." (D&C 59:10–12). Ao n

aki maan imwiina, e taekinna te Uea nakoia ana reirei n taai aikai te tua ae akea tokina ni kaineti ma kawakinan te Tabati. E taku: "A riai kaain Tion ni . . . kateimatoa tabun te bong ae te Tabati" (D&C 68:29).

Ngkana te Tabati bon te bong ae ti riai ni karinea bwa te Tabati? Ti na kanga ni kawakina te bong ae te Tabati bwa e na tabu? N te kawai ae ti tebo ma are e a tia ni kateia te Atua ibukin te Tabati mai ibuakon Ana bong ake tabeua, ngaira naba ti riai ni kaokoroa mai ibuakon ara bong ake tabeua. Karaon te Tabati bwa e na kaokoro mai ibuakon boong ake tabeua e moanaki man karoaan te bwai ae taekinna te Uea nakoia kaain Iteraera ngkoaa ao tera ae kaokiokia nakon Iotebwa Timiti. "[M]otirawa man am mwakuri" (D&C 59:10; Te Otinako 35:2), E tuanga Iotebwa Timiti, nanona katikui mwakuri aika ko kakaraoi inanon maium ni katoabong. Tera ae ti riai ni karoia irarikin are ara mwakuri ni katoabong? Te Uea e tuanga Iotebwa Timiti: "naako nakon te auti n tataro" (D&C 59:9), nanona kaei am bootaki n taromauri n te Ekaretia. Ao tera ae ti riai ni karoia n na Ana auti te Uea n tataro? Riki, te Uea e tuanga Iotebwa Timiti: "angam anganano ao am karea nakon te Moan Rietata" (D&C 59:9,12), nanona bwa ko na anga ngkoe nakon te Uea n te mwakuri ni ibuobuoki ao n iri ma nanom ni koaua n te otenanti n te angakarea.

Ngaia ae, te motirawa man ara mwakuri, kaeau ara taromauri n te Ekaretia, karoan te mwakuri ni ibuobuoki, ao kanakin te toa bon



E tei ibukin ana berita te Atua ni uotia aika a kawakina ao a karinea te Tabati nako nanon Oin mweengana n te tiretio ao ni katauraoi ibukiia n tatabemaniiia te tabo ao te ara ae na aki kona ni bua.



bwaai aika kakawaki ibukin karinean te Tabati. Iaon bwaai aikai, bon, iai bwai tabeua aika ti riai ni karoai? Iai bwaai aika ti riai n aki karoai? N na taekina ana taeka Unimwaane Russell M. Nelson are e kanakoa te rongorongo aei n ana Maungatabu ni Kabuta te Ekaretia n te tai ae aki maan n nako. “N au ririki ni kairake,” e taku Unimwaane Nelson, “I kamatebwai aia mwakuri tabeman ake a tia ni ikoikoti karinanin bwaai aika ana karoai ao aika ana aki karoai n te Tabati. E aki maan imwiina ngke I reiakinna man booki aika tabu ae kateiu ao aroarou n te Tabati e kota te kanikina imarenau ma Tamau are i Karawa. Ma otau anne, I aki kainnanoia ni karinani bwaai aika N na karoai ao aika N na aki karoai. Ngkana N na karoa te babaire bwa te waaki are N na karoa e riai ibukin te Tabati, I titirakinai bon irou, ‘Tera te kanikina ae I tangiria n angan te Atua?’ Te titiraki anne e kamataata raoi au rinerine ibukin te Tabati.” I kamoamoa te reirei aei nakoimi n tatabemani ngkami n ami kangaanga aika kakaokoro. Ngkana ko kaitibo ma te babaire iaon te bwai ae ko riai ni karoia ke n aki karoia n te Tabati, titirakiniko bwa tera te kani-kina ae ko tangiria n angan te Atua, ao imwiina ko karoa nanona.

Teuana te katei ae moan te tamaroa n te Betebeweke bon aron karinean te Tabati. Mwakuri ni katoa bong a katukaki. Aomata ni kabane a nakon te Taromauri n oin ke n aia kunnikai ae tamaroa. Ao e kona te kuaea ao kaain te taromauri n ongoraeaki bwanaaia n anene inanon te kaawa.

Ma inanon te nimaua n ririki n au tai ni mwakuri n te Betebeweke, I noora katein te bong ae te Tabati ni karau-rau ni bitaki. I kona n noora rikiraken titoa ni uki. I noora rikirakeia aomata ni bobwai n te Tabati. Ao I noora rikirakeia aomata n akawa, ni mwakuri n aia tawaana, ao ni kateitei n te Tabati. Ni uarerekena, I kona n noora te Tabati bwa e kamaunaaki ao ni karikaki bwa kanga te bong teuana n te wiiki. I kona n nooria aomata aika mwaiti ni kinaaki n aroia n iangoia bon irouia ao n oin kukureia ao kainnanoia, nakon iangoan te Atua ao Ana mwakuri.

Tariu ao mwaaneu, I kairoroi ngkami n te bong aei ni kabouii ami berita nakon kawakinan ao karinean te bong ae te Tabati. Karaoa te Tabati bwa te bong ae ko angan te Atua. Karaoa bwa te bong are ko kaota iai am tangira Ibukina, am kakaitau ibukin Ana kakabwaia aika mwaiti, ao am onimaki ni mwakan ao te berita n Ana mwakuri ni kamaiu. Karaoa bwa te bong ae ko KARAOI iai bwaai aika tau ma n tabu. Ti man te taubaang n aki mwakuri ao ni kakakibotu ao ni matu n angiin te bong anne bon tiaki kawakinan ao karinean te Tabati. Kamatebwai te euangkerio. Reireiniia am ataei. Tabeakinaia rarikin ao aika kain-nano. Karaoi reitaki aika uruaki. Ikoikoti araia utu ao katauraoia ibukin te mwakuri n te tembora. Ni uarerekena, katinanikui bwaai aika ko taneiai ni karoai n te Tabati bwa tinanikun te kanikina n am berita ao am kakaitau nakon te Atua ao Ana mwakuri ni kamaiu n te aonaaba.

Katamaroa karinean te bong ae te Tabati iroum, ao karekea bon ibukim ana kakabwaia te Atua ae akea kabotauana are e berita iai nakoia ake a kawakinna ao ni karinea Ana Tabati!

Karinea te Bong ae Te Tabati

Ngkai, teuana te bwai ae moan te kakawaki ae ti kona ni karoia ni kawakina ao ni karinea te Tabati bon man ara kakaonimaki n ira te otenanti n te toa. Ni koauana, bon te tua mairoun te Uea bwa, n te Tabati, ti karoai ao n ira te otenanti ae tabu aei. E taku: “Ao ko na . . . karoa au toa n au bong ae tabu” (D&C 59:9). Man aei ti kona ni motikia bwa ti aki kona ni kawakina tabun te bong ae te Tabati ni karokoa ae ti kabanea nanora nako iai ao ni kakaonimaki n ira te otenanti n te toa.

Tera ae karika te toa bwa te bwai ae rangin ni kakawaki, e rangin n tau ibukin kawakinan te bong ae te Tabati? Tariu ao mwaneu, ti na uringa bwa boton te kantatinga ibukin te Tabati bon ibukira bwa ti na toki man ara mwakuri ni katoabong ao n uringa te Atua—uringa Ana karikibwai ao Ana mwakuri ni katabua, ke ni kamaiuia, ni kabane aika karikaki. Nakon te toki ae tabu anne, te otenanti n te toa e kateaki ni kabebetea tiaki ti ara ururing ma ara kariaia naba n ana mwakuri ni kamaiu te Atua ae korakora nakon te aonaaba—anne are bon Ana Mwakuri ni Kamaiu Iesu Kristo. Ngai a ae, ngkana ti ira te otenanti n te toa ma te kakaonimaki ao te onimaki, ti kakorua nanon raoi te Tabati.

Te otenanti n te toa e a tia n atongaki bwa “teuana mai ibuakon otenanti aika tabu ao e rangin ni mimitong ao n tabu n te Ekaretia.” E kainnanoaki bwa e na riki ni mimitong riki ao n tabu nakoira n tatabemaniira. N te tairiki i Ketetemwane n te tabo ae te Tabanou, Iesu e baronga te otenanti n te toa. Ma ana abotoro, Iesu e ana te kariki, e kakabwaia ao e tabeutaia, ao e anganii, ao E kanganai, “Anaia, kanna” (Mataio 26:26). “Rabatau aei ae I anga ibukimi: kam na karaoa aei ba kanuringau” (Ruka 22:19). N aron anne, E ana te mwangko ni wain, e anga te kakabwaia iaona, ao e kabutia nakoia Ana abotoro, n taekina: “Te mangko aei te berita nabangkai inanon raraau” (Ruka 22:20), “ae kawawaeki . . . ba baini kabwaraan aia bure” (Mataio 26:28). “Kam na karaoa aei ba kanuringau” (Ruka 22:19).

N te katei ae nano man bebete aei, E reireiniia ana reirei Iesu, ao ni kabane ana reirei man te tai anne, bwa ti na kanga n uringnga ao ni karinea ana mwakuri ni kamaiu ibukira ao ti na kanga ni karekea kaniwangara man te mwakuri ni kamaiu anne. Ma te kariki ae raeraeaki man uruaki, ti kaotia bwa ti uringa rabwatan Iesu Kristo—te rabwata are e kammarakaki, karawawataaki, ao kariiriaki n taian kariiri nako, te rabwata are e kaitara ma te maraki ae korakora are e a kona ni waanako iai te rara man bwangabwangan nako te rabwata, te rabwata are e korobitiaki ao nanona are e uruaki n te tauraki. Ti kokoaua ara onimaki bwa ngkana te rabwata naba anne e kaweneaki

ni kamotirawaaki ni mate, e a manga kateirakeaki nakon te maiu man te ranimate, n aki manga ata te aoraki, te mka, ke te mate. Ao n anakin te kariki iroura, ti butimwaea anne, n aron rabwatan Kristo ae mamate, rabwatara ana kabwaraaki man ana kabaebae te mate, teirake ma te tokanikai man te ranimate, ao ni kaokaki nakoia tamneira aika akea tokiiia.

Ma te mwangko n ran ae uarereke, ti kanikinaea ae ti uringa raraan Iesu n timtim ao te korakai n tamnei are E rinanona ibukiia aomata ni kabane. Ti uringa te rainanoanga are e krika timtimin te rara ae korakora ni bwaka i Ketetemwane. Ti uringa te nikunikun ao te bwainikirinaki ae E keiakinna ni baia taan kabaea. Ti uringa te rara ae E timtim man Bainā, waena, ao rarikina ngke e mena n te Tabanou. Ao ti uringa oin Ana iango ni Karawawataakina: “E kanga aron kamarakina ko aki ataia, e kanga aron tamaroana ko aki ataia, eng, e kanga aron matoana ko aki ataia.” N nimakin te ran iroura, ti kokoaua ae Raraana ao korakaina e kamaiura man ara bure ao E na kaitiaki ara bure ngkana ti taui ao ni butimwaii reirei ao otenanti n Ana euangkerio.

Ngaia ae, ma te kariki ao te ran, ti kauringaaki n ana mwakuri ni kamaiu Iesu ibukira man te mate ao te bure. Rinanon tataron te toa, ti kaota ara kariaia n Ana mwakuri ni kamaiu ao ni kabanea ara tai n te mwakuri ni kamaiu anne. N ara berita nakon te Atua, Tamara ae akea Tokina, ti taekinna bwa ti na “ururingngā n tainako” Natina ae moan te kakawaki. Ni kakabwaiaan te kariki, ti kaota nanora bwa


ti na ururingngā; ni kakabwaiaan te ran, ti taekinna bwa ti “na” ururingngā (Kabotaua ma D&C 20:77 ao 20:79). N taekinana, ti karaoa te berita nakon te Atua ae Tamara ni kamwakura te onimaki iroun Iesu Kristo ao iroun Ana Tia Kabooi maiura man te mate ao te bure.

Ti taekinna riki bwa ti na “kawakin ana tua.” Anne te kabaebae ae tabu n rairannano. Ngkana ara iango, ara taea, ke ara mwakuri e a tia ni kerikaaki ni kabotauaki ma ae a tia n riki n taaia aika nako, ti a manga kataua inanora bwa ti na kaania riki maiura ma Ngaia inanon boong aika ana roko.

Imwiina, ti taekinna bwa ti “kukurei ni katoka [iaora] aran [te] Nati.” Anne te kabaebae ae tabu n anga ngaira nakon Ana kariaia ao ni karaoa Ana mwakuri, are e raonaki ma karekean otenanti ni kamaiu ao berita ao karaoan otenanti akanne ao berita aika tabu n tauraoi nakoia tabeman rinanon ara mwakuri n Ana Ekaretia te Uea.

Ngkana ti kabanea ara tai nakon reirei aikai, ti anganaki n te berita n te tataro n toa bwa e na “memena Tamneina [iaoral].” Karekean te Tamnei ae boou bon te kakabwaia ae korakora. Bon te Tamnei ae kaitiakiira ao n tebokiira man ara bure ao ara kairua. Ti naake a rangin n itiaki ao ni kabououaki aika a kona ni maeka ma te Atua. Ngaia ae, taum ni karekeia te Tamnei rinanon te otenanti n te bwapbetito, ke kabouan te Tamnei rinanon te otenanti n te toa, e bon rangin ni kakaawaki nakon kamaiuakira n te kabanea n tai.

Tariu ao mwaneu, te kabanea ni bwai ae kakawaki ae a tia n riki n




te tai aei ao n akea tokina bon Ana mwakuri ni Kamaiu Iesu Kristo. Teuare e kakoroa nanon te mwakuri ni kamaiu e anganira te otenanti n te toa ni buokiira tiaki n ti uringnga ma ni karekei naba kakabwaia n te mwakuri n akoi ae moan te nakoraoi aei. Ko kona n taiaoka n iangoia bwa, n tain katabuan te toa, ko uringa ao ko bubuti karekean kakabwaia n te mwakuri ni kamaiu inanon maium? Ngkana ko atonga amen nakon kakabwaiian te kariki ao te ran, ko ataia bwa tera ae ko kantaninga? Ngkana ko karekeia te kariki ao te ran, ko

ataia bwa tera ae ko taekinna nakon te Atua? Ngkana ko tataninga ibukin te toa bwa e na kabutaki nakoia tabeman, ko iangoia ma te kakaitau iaon maium ao ana mwakuri Iesu Kristo? Ko taraa aron maium ao tera ae kainnanoaki bwa e na katamroaaki? Ko karaoi berita ao ko a tamara riki? Ko kaboua am onimaki iroun Kristo, ni manga kanakoraoa am tangira Ibukina ao Ana mwakuri, ao ni kakorakora am kakaitau ibukin Ana kamaiu? Ko namakina Tamnein te Uea imwiin rorokom n tain kabutakin te toa?

Ma te kariki ae raeraeaki man uruaki, ti kaotia bwa ti uringa rabwatan lesu Kristo—te rabwata are e kammarakaki, karawawa-taaki, ao kariiriaki n taian kariiri nako, te rabwata are e kaitara ma te maraki ae korakora are e a kona ni waanako iai te rara man bwangabwangan nako te rabwata, te rabwata are e korobitiaki ao nanona are e uruaki n te tauraki.

Ngke e rin Iesu i Ketetemwane ni wakina te mwakuri ni kamaiu, e kairia ma ngaia tabeman ana reirei. Mai ibuakoia Iesu e taetae nakoia “kamarurungi ngkami ao tataro” (Mataio 26:41). Imwiina, ao e oki Iesu ao e nooria bwa a matu. “Ko aki kona ni kamarurungko ti teuana te aoa?” E titiraki (Mareko 14:37). “[T]e irake ao tataro, ba kam na aki kaririaki,” e kaurangiia Iesu (Ruka 22:46). Te kaibibiti aei e rangin ni bongana ibukira. E a tia te Uea n tuangira bwa ti na taratara ao n tataro, n aron Ana anga karea n rabwata ao n te rara



Karaoa te Tabati bwa te bong ae ko angan te Atua. Karaopia bwa te bong are ko kaota iai am tangira ibukina, am kakaitau ibukin Ana kakabwaia aika mwaiti, ao am onimaki ni mwaakan ao te berita n Ana mwakuri ni kamaiu.

a kauringaki n te toa. Ngaira ti, katotongii ana reirei n te onaroka, ni matu? Tiaki kona n taratara ao n ururing ao n iango ibukin tabeua te miniti, kariaia ti teuana te aoa? Ti na butakinako man iango n raraoma baika a katabetabe n akea maneia ake ti na kairua iai n tain irakin ana katairiki te Uea ao n tataro ma nanora ni koaua ni kauringa ao ni kakaitau ibukin kamaiuan tamneira. Ni karoana, ti na rangin n tauraoi n totokoi kaririin te aonaaba.

Tariu ao mwaneu, I tataro bwa ti na kona ni kakaonimaki riki ni kakawakina ao ni karinea te bong ae te Tabati ao ni karinea riki ana toa te Uea n te bong ae te Tabati. Karaopian aei e na kakorakora te onimaki iroun te Tama are i Karawa ao Natina, Iesu

Kristo. Karaopian aei e na katauira naba ibukin kakabwaia i karawa n te tai aei ao n akea tokina, riki ana kakabwaia n te maiu ae akea tokina. I kaota au kokoaua iroun te Tama ao Natina, n aia tangira, nanoanga, ao n tamaroaia

ae akea tokina nakoia aia ataei ni kabane, ao ni kakabwaia aika kamiimi aika a reke nakoia aika kakaonimaki ni kawakina Ana Tabati te Uea ao ni karekea ana toa te Uea.

N aran Iesu Kristo, Amen. ■

ITERANIBA N TE TABO

Am Iteraniba n te tabo e katauraoaki irouwia kaain te ekaretia n oin ami tabo iaan ana kairiiri te Beretitentii n te Aono bwa e aonga n taekinaki iai kainna-noia ao aia mwakuri kaain te ekaretia n te tabo ae ko maeka iai. Karinakin iteraniba n te tabo ni katoa baan te beebea ni kaongora e nakon tauraoi kanoana man te tabo. Ti katoi ngkami bwa kam na tibwauai ami onimaki ni karikirakei iango ao mwakuri man kawaran am eteta n ami tabo n te:

liahona-pacific@ldschurch.org ■